

PIUS PP. VI.

*Dilectis Filiis Nostris S. R. E. Cardinalibus ;
& Venerabilibus Archiepiscopis , & Episcopis ,
ac Dilectis Filiis Capitulis , Clero & Populo
Regni Galliarum , Salutem & apostolicam
benedictionem.*

CHARITAS , quæ , docente Paulo apostolo ,
patiens & benigna est , tamdiu omnia suffert , ac
sustinet , quamdiu aliqua spes remanet , ut per
mansuetudinem iis , qui obrepere jam cœperint ,
erroribus occurratur. Verum si errores augeantur
in dies , eoque jam deveniant , ut res ad schisma
delabantur , tunc leges ipsæ charitatis , cum
apostolici muneris , quo indigni fungimur , offi-
ciis conjunctæ , postulant flagitantque , ut paterna
quidem , sed prompta , & efficax enascenti morbo
medicina afferatur , patefacto errantibus culpæ
horrore , & canonicarum pœnarum , in quas
inciderunt , gravitate. Ita enim fiet , ut qui à
viâ veritatis recesserunt , resipiscant , & ejuratis
erroribus ad ecclesiam revertantur , quæ veluti
benigna mater apertis ulnis regredientes amplecti-
tur ; utque cæteri fideles maturè pseudo-pastorum
fraudes evadant , qui aliunde quam per ostium ad

A

Ovile accedentes nihil quærunt aliud, nisi ut furentur, mactent, & perdant.

Hæc nos ante oculos habentes divina præcepta, vix belli rumorem audivimus, quod philosophi novatores in conventu nationali galliarum simul conjuncti, majoremque partem constituentes adversus catholicam religionem excitabant, acerbè quidein deflevimus apud Deum, communicataque cum venerabilibus fratribus nostris S. R. E. Cardinalibus animi nostri anxietate, cum privatas, tum publicas preces indiximus. Hinc datis die 9 julii 1790 ad charissimum in Christo filium nostrum Ludovicum Regem christianissimum litteris, eum etiam atque etiam hortati fuimus, ut se à *civili constitutione cleri* confirmandâ abstineret, quæ & nationem in errorem, & in schisma regnum induceret. Nulla enim ratione fieri poterat; ut politicus hominum cœtus universalem ecclesiæ disciplinam immutaret, sanctorum patrum sententias, & conciliorum decreta pessumdaret, hierarchicum ordinem everteret; episcoporum electiones arbitratu suo moderaretur, episcopales sedes destrueret, & meliori ablatâ, deteriorem formam in ecclesiam inveheret.

Utque hortationes nostræ christianissimi regis animo altius insiderent, alias binas dedimus in forma brevis litteras die 10 ejusdem mensis ad Ven. Fratres archiepiscopos Burdegalem, ac Viennensem, qui eidem aderant regi, eosque paternè monuimus, ut sua cum nostris concilia conjungerent, ne, si prædictæ constitutioni auctoritas quoque regis accederet, schismaticum regnum ipsum evaderet, schismatici episcopi, qui

ad præscriptam decretorum formam crearentur ; quos nos ipsi propterea declarare , ut pastores intrusos , omnique carentes ecclesiastica jurisdictione teneremur. Et quò dubitari minimè posset , curas & sollicitudines nostras unicè ad res religionis referri , & quò inimicorum hujus apostolicæ sedis occluderentur , præcepimus *suspendi exactiones taxationum* pro gallicis expeditionibus , ex pristinis conventionibus , perpetuaque consuetudine nostris officiis debitum.

Abstinuisset profecto rex christianissimus à constitutione fancienda ; sed urgente atque impellente conventu nationali tandem eò se abripi passus est , ut suam constitutioni auctoritatem adjungeret , quemadmodum ipsius litteræ die 28 julii , die 6 septembris , & die 16 decembris ad nos datæ præferunt , quibus nos etiam atque etiam rogabat primo , ut quinque , deinde , ut septem , saltem per modum provisionis , probaremus articulos qui parum inter se dissimiles totam novæ constitutionis veluti epitomen complectebantur.

Illicò sane perspeximus , neutros articulos posse à nobis probari , aut tolerari , utpote qui regulis canonicis adversarentur. Nolentes tamen , ut hinc inimici occasionem populorum decipiendorum arriperent , perinde ac si nos ab omni ratione conciliationis ineundæ essemus alieni , volentesque eâdem semper incedere mansuetudinis semitâ , regi declaravimus per nostras litteras die 17 Augusti ad ipsum datas , articulos hujusmodi nos sedulo perpensuros , & in consilium vocaturos S. R. E. cardinales , qui simul congregati omnia ad trutinam revocarent. Hi porrò cum simul his

convenissent die 24 septembris, & die 16 decembris, ut primos, & alteros articulos expendere, habito rerum omnium diligentissimo examine, unanimi consensione putarunt, sententias gallicanorum episcoporum super propositis articulis esse exquirendas, ut canonicam quamdam, si fieri posset, rationem ipsi indigiterent, quam hinc apte excogitari posse locorum intervalla vetabant, veluti nos ipsi per alias nostras litteras regi christianissimo ante significavimus.

Nostrum interea dolorem, quo vehementer afficiebamur, non levis consolatio lenivit, dum interim major episcoporum gallicanorum pars sua sponte pastoralis sui muneris officiis adacta, & amore veritatis incensa constanter adversabatur ipsi constitutioni, eamque oppugnabat in iis omnibus, quæ ad ecclesiæ regimen pertinerent. Huic autem consolationi nostræ novus quoque cumulus accessit, ubi dilectus filius noster S. R. E. cardinalis Rupefucaldius, venerabilesque fratres archiepiscopus Aquensis, aliique archiepiscopi, & episcopi ad numerum usque triginta, ut tot tantisque malis occurrerent, ad nos confugerunt, die 10 octobris litteris datis *expositionem* miserunt *super principiis constitutionis cleri*, suo cujusque nomine subscriptam, consiliumque nostrum & opem postularunt, & tutam agendi normam, in qua conquiescerent, à nobis exquisierunt, tanquam à communi magistro, & parente. Illud quoque magis magisque nostram consolationem adauxit, quod alii episcopi bene multi, primis adjuncti, prædictam expositionem amplexi fuerant, ita ut cum ab episcopis centum triginta

& uno , istius regni quatuor dumtaxat diffident , cumque tam ingenti episcoporum numero capitulorum etiam multitudo , & paróchorum sive pastorum secundi ordinis pars major accederet , hujusmodi sane expositio , concordie animorum consensione suscepta , totius gallicanæ ecclesiæ doctrina haberetur , & esset.

Equidem nos ipsi nulla interjecta mora tunc operi manus admovimus , omnesque dictæ constitutionis articulos examini subjecimus : sed gallicanæ nationis conventus quamvis concordēs illius ecclesiæ voces audiret , nihilominus tantum absuit , ut ab incœpto desisteret , ut ipsa magis irritaretur episcoporum constantia. Videns itaque , planeque cognoscens , ex metropolitanis , & ex episcopis antiquioribus inventum iri neminem , qui confirmare se posse crederet novos episcopos , per laicos , per hereticos , per infideles , & per Judæos in municipalibus , districtibus electos , veluti edita decreta imperabant ; videnſque insuper absurdam hanc regiminis formam nullo loco posse subsistere , cum sine episcopis omne ecclesiæ simulacrum evanescat , de aliis magis absurdis edendis decretis cogitavit , quemadmodum factum est die 15 , & 27 novembris , & diebus 3 , 4 & 25 januarii 1791. His porro decretis , quibus subinde regiæ etiam auctoritatis robur accessit , cautum est , ut , metropolitano , sive antiquiore episcopo consecrare novos electos renuente , quilibet alterius districtus episcopus eosdem electos consecraret. Quinimò ut una opera , unoque temporis momento omnes probi episcopi , omnesque pariter parochi catholica

religione incensi dispellerentur , cautum prætereà est , ut cum primi , tum secundi ordinis pastores omnes *absque restrictione* jurarent , se constitutionem , quæ jam edita esset , quæque in posterum ederetur , servaturos ; qui autem id constanter detrectarent , ii non secus haberentur , ac si essent è suo gradu dejecti , eorumque sedes , & parochiæ suo pastore carerent. Legitimis autem pastoribus & ministris per vim etiam expulsi , licitum esset municipalibus districtibus ad electionem novorum episcoporum & parochorum procedere ; hi verò electi posthabitis metropolitaniis , & antiquioribus episcopis , qui juramentum minimè præstitissent , directorium adire deberent , cui curæ esset *episcopum quemquem* designare ad illos confirmandos & instituendos.

Istius modi decreta , posterius edita , supra modum novo animum nostrum dolore perculerunt , nostrumque auxerunt laborem , ut ad hæc quoque nostra extenderetur sollicitudo in ea , quam tunc parabamus , ad episcopos responsione , nostrasque curas denuò excitarunt ad publicas preces indicendas , & ad misericordiarum patrem exorandum. Hæc ipsa decreta in causâ fuerunt , cur galliarum episcopi , qui egregiis editis lubricationibus oppugnandam cleri constitutionem susceperant , novas in vulgus *litteras pastorales* ediderint , omnesque industriæ suæ nervos contenderint adversus ea , quæ circa juramentum , circa depositiones episcoporum , circa sedium episcopalium vacationes , circa novorum pastorum electiones confirmationesque constituebantur. Ex quo factum est ut tota ecclesia gallicana fatente ,

& consentiente, haberi deberent juramenta civica tanquam perjuria ac sacrilega, non ecclesiasticis modo, sed catholico quovis homine prorsus indigna, omnesque consequentes actus tanquam schismatici pro nullis, irritis, gravioribusque censuris obnoxii.

Hiscæ cleri gallicani declarationibus, digna laude celebrandis, facta responderunt: episcopi enim ferè omnes, & parochorum pars maxima sacramentum præstare invicta animi constantia detrectarunt, probè tunc agnoverunt religionis inimici, pessima sua consilia omnia in irritum recasura, nisi alicujus episcopi, aut ambitione ducti, aut inbecillis, animum pervicissent; qui proinde & juramentum de constitutione tuenda præstaret, & sacrilegas etiam manus ad consecrationes admove-
ret, itaut ad schisma inferendum nil amplius deesset. Hos inter aliorum malitia, & fraude devictos primus extitit Carolus episcopus Augustodunensis, constitutionis fautor acerrimus, alter fuit Joannes Joseph episcopus Liddæ, tertius Ludovicus episcopus Aurelianensis, quartus Carolus episcopus Vivariensis, quintus cardinalis de Lomenie archiepiscopus Senonensis, ac perpauci secundi ordinis pastores infelicissimi.

Ad cardinalem de Lomenie quod attinet, is datis ad Nos die 25 superioris novembris litteris, juramentum abs se præstitum excusare contendens, illud non esse habendum *pro animi assensu* affirmabat, seque valde in ancipiti esse præseferabat, num electis manus imponere detrectaret (ut eò usque abstinuerat), nec ne. Cum verò quam maximè interesset, ut episcoporum nemo ad electorum consecrationem accederet, utpote quæ

latiorem ad schisma communiret viam , è re visum est nostram ad episcopos responsionem , quæ penè absoluta erat , tantisper intermittere , nullaque interposita , mora die 23 februarii cardinali rescribere , demonstrando eidem tum sententiæ suæ errorem in præstito jurejurando , tum pœnas , quæ per canones infliguntur , & ad quas non sine animi nostri ægitudine manus admovere cogeremur , eum cardinalitia etiam dignitate exuentes , nisi publicam offensionem tempestiva , ac digna satisfactione retractaret. Quod verò ad illius dubium pertinebat de pseudo electis consecrandis nec ne , conceptis verbis ipsi præcepimus , ne eò usque progrediretur , ut novos episcopos ob quamvis etiam causam necessitatis institueret , novosque ecclesiæ refractarios adjungeret ; de jure enim agitur , quod unicè spectat ad apostolicam sedem juxta tridentini concilii sanctiones , quodque arrogari sibi à nemine potest episcoporum , aut metropolitanorum ; quin nos illo , quo fungimur , apostolici officii munere declarare cogamur , schismaticos simul esse tam eos qui confirmant , quàm eos qui confirman-
tur , nulliusque roboris futuros illos actus omnes ab utrisque prodituros.

His peractis , quæ supremi pastoralis officii nostri ratio postulabat , resumendum per nos fuit responsionis opus , quod jam laboriosius ac diuturnius evaserat propter multiplices , quæ se mutuo subinde exceperant , novitates : illudque , Deo adjuvante , absolvere ita valuimus , ut , omnibus articulis ad examen revocatis , neminem prorsus lateret , novam cleri constitutionem ex

nostro , & apostolicæ hujus sedis judicio , quod gallicani episcopi à nobis exquisierant , quodque galliarum catholici peroptabant , ex principiis coalescere ab hæresi profectis , adeòque in pluribus decretis hæreticam esse , & catholico dogmati adversantem , in aliis vero sacrilegam , schismaticam , jura primatus , & ecclesiæ evertentem , disciplinæ cum veteri tum novæ contrariam , non alio denique consilio excogitatam atque vulgatam , nisi ad catholicam religionem prorsus abolendam. Ad hanc enim unam profitemdam libertas omnis adimitur , legitimi pastores submoventur , bona occupantur ; dum reliquarum sectarum homines in sua libertate , bonorumque possessione conquiescunt. Quamvis hæc omnia luculenter demonstravimus , à mansuetudinis tamen via minimè recedentes declaravimus , nos hætenus continuïssè , ne abscissos ab ecclesia catholica auctores male ominatæ constitutionis civilis cleri declararemus , sed una simul illud repetere debuimus , quod nisi quisque errores , à nobis jam patefactos , detestetur , (quemadmodum hæc S. Sedes in hujus modi casibus peragere semper consuevit ,) cogeremur inviti eos omnes schismaticos declarare , qui vel essent hujusce constitutionis auctores , vel eidem juramento adhærerent , qui in novos pastores præficerentur , qui electos consecrarent , & qui ab illis consecrarentur. Illi enim , quicumque essent , legitima missione , & ecclesiæ communionem carerent.

Quemadmodum autem , salvo dogmate , & salva universali ecclesiæ disciplina , ita animo com-

parati sumus , ut inclytæ Galliarum nationi , quoadusque licet , obsecundemus , sic cardinalium , hac de causa advocatorum , consilium secuti , & ea repetentes , quæ christianissimo regi per nostras litteras jam significaveramus , hortati sumus episcopos , ut ii , quorum oculis res ipsæ observantur , nobis desuper agendi rationem quamdam exhiberent , si inveniri fortasse poterit , à catholico dogmate , disciplinaque universali minimè dissentaneam , in nostram deliberationem atque examen adducendam. Hos ipsos animi nostri sensus significavimus carissimo in Christo filio nostro regi christianissimo , ad quem nunc sumus etiam nostræ ad episcopos responsionis exemplum , eumque hortati in domino sumus , ut in consilium adhibitis sapientioribus episcopis , magis aptam medicinam afferet morbo , qui è regia etiam auctoritate profluxit , & eum denique certiores effecimus , non in illos , qui errori pervivaces hærebunt , ex debito pastoralis officio ea præstituros , quæ in eadem necessitate positi decessores nostri præstiterunt.

Utræque litteræ nostræ ad regem , & ad Episcopos datæ die 10 martii extraordinario cursori traditæ sunt qui insequenti mox die discessit. Interim die 15 ejusdem mensis adveniente huc ex Gallia cursore ordinario , allatum ad nos undique est , die 24 februarii Lutetiæ Parisiorum fuisse schismati culmen impositum. Illa enim die *augustodunensis* episcopus jam perjurii crimine infectus , & reus defectionis ob dimissam auctoritate propria , & coram hæcicis ecclesiam , capituloque suo , omni commendationum

laude digno , longe abſimilis conjunctus eſt Babylonis & Liddæ episcopis ; quorum primus à nobis pallii decoratus honore , & vitæ quoque auctus ſubſidiis , dignum ſe ſucceſſorem exhibuit alterius Babylonis episcopi , ſcilicet *Dominici Varlet* , hominis propter ſchiſma ultrajectenſis eccleſiæ ſatis noti : alter vero perjurii item reus , in odium jam & deteſtationem bonorum inciderat , eo quod à recta episcopi , capitulique Baſileenſis eccleſiæ , cujus ille eſt ſuffraganeus , doctina diſſideret. Illa igitur die episcopus Auguſtodunenſis , cooperantibus duobus hæc episcopis , auſus eſt in eccleſia præſbyterorum oratorii , irrequiſito ordinario ſacrilegas manus imponere *Aloyſio Alexandro Expilly* , & *Claudio-Euſtachio - Franciſco Marolles* ſine illo apoſtolicæ ſedis mandato , omiſſo juramento obedientiæ pontifici debitæ , poſthabito examine , & fidei confeſſione præſcripta in pontificali romano , in omnibus univerſi orbi eccleſiis ſervando , cunctiſque prætereà legibus neglectis violatis , peſſumdatis ; licet ignorare non poſſet , horum primum minus rite electum fuiſſe episcopum. *Coriſopitenſem* contra Coriſopitenſis capituli iteratas , & graves obteſtationes , & alterum multò minus rite fuiſſe episcopum eccleſiæ *Sueſſionenſi* datum , quæ legitimum paſtorem ſuum vivum atque incolumen habet ven. fratrem Henricum-Joſephum-Claudium de Bourdeilles , qui proinde officii ſui partes eſſe putavit , acriter in actum tantæ profanationis invehere , promptaque allata ope ſuæ diœceſi conſulere , quemadmodum ejusdem litteræ inſequenti mox die 25 in vulgus editæ ipſum feciſſe teſtantur.

Allatum etiam eodem tempore ad nos est nominatum *Liddæ* episcopum primum crimen novo crimine cumulasse. Die enim 27 ejusdem mensis februarii , sibi novis pseudo-episcopis Expilly & Marolles in socios abjunctis , ausus fuerat in eadem ecclesia sacrilegè consecrare in episcopum *Aquensem* parochum *Saurine* , quamvis hæc etiam ecclesia optimo suo pastore Ven. fratre Carolo-Augusto Lequien læta gaudeat , & perfruatur. Ex quo evenit fortasse , ut idem *Liddæ* Episcopus Joannes-Joseph *Gobel* ad ecclesiam *Parisiensem* , vivo adhuc Archiepiscopo , electus fuerit exemplo *Ischyrae* , qui = *ad compensationem sceleris obsequiique præstiti* = in accusando , & è sua sede exturbando S. Athanasio , fuit in conciliabulo Tyri episcopus ejusdem civitatis renunciatus.

Molesti hi quidem , tristesque nuncii incredibili animum nostrum dolore ac mœrore oppresserunt. Sed spe in deum erecti cogi iterum jussimus die 17 mensis martii eandem cardinalium congregationem , quæ nobis , sicut alias , in re tam gravis momenti suam sententiam expromeret. Dumque in eo versabamur , ut deliberationem exequeremur cum consilio cardinalium susceptam , ecce alius istius regni tabellarius die 21 dicti mensis ad nos defert , *Liddæ* episcopum , nequiorem etiam effectum , ab pseudo-episcopis Expilly , & *Saurine* sociatum die 6 ejusdem mensis in eadem ecclesiâ , eademque sacrilegâ manu consecrassè parochum *Massieu* , unum ex deputatis gallicani conventus , in episcopum *Bellovacensem* , parochum *Lindet* alterum item ex deputatis in

episcopum *Ebroicensem*, parochum *Laurent* alterum pariter ex deputatis in episc. *Molinensem*, & parochum *Heraudin*, in episcopum *Castri Ruffi*, idque præstare ausum fuisse; tametsi duæ priores ex his ecclesiis suos habeant pastores legitimos, & reliquæ duæ nondum fuerint apostolicâ auctoritate in sedes episcopales erectæ. Quale autem iudicium fieri de iis debeat, qui eligi se consecrarique permittunt ad illas ecclesias, quæ à suis adhuc reguntur atque administrantur episcopis, multis ante nos annis à S. Leone egregiè declaratum est: scribens enim *Juliano* episcopo *Cœnsi* adversus Theodosium quemdam, qui in sedem Juvenalis episcopis viventis invaserat, *qualis autem sit*, (inquit cap. IV.) *qui in locum episcopi viventis obrepfit, ex ipsâ qualitate facti non potest dubitari, nec ambigendum est, eum esse perversum, quem impugnatores fidei dilexerunt.*

Et re quidem verâ quam meritò abhorrerit semper ecclesia ab illis, qui à laïcorum turbâ & colluvione eliguntur, quippe eodem, atque eligentes, falsarum opinionum morbo laborant, satis superque demonstrat delata per eundem tabellarium ad nos Pastoralis epistola, quam pseudo Episcopus *Expilly* ad imperitiorum deceptionem die 25 Februarii edendam curavit, non alio sanè consilio, nisi ut inconsutilem Christi vestem abscinderet. Hic enim primo iuramentis, perjuriis scilicet, quibus se adstrinxit, commemoratis, omnia complectitur fundamenta Gallicæ constitutionis, quam ferè de verbo ad verbum exscribit, & sententiis ipsius conventûs

inhærens ad probandum aggreditur, per constitutionem hujusmodi nihil de dogmate detrahi, sed disciplinæ tantum meliorem formam induci, eamque ad priorum sæculorum puritatem converti in eâ præsertim parte, in quâ populo electiones, amoto clero, & Metropolitanis institutiones, consecrationesque redduntur, solis hoc loco *prioribus* Gallici conventus decretis in medium adductis. Utque melius fortasse fucum imperitioribus faciat, litteras memorat die 18 Novembris 1790, ad Nos datas, perinde ac si cum Apostolicâ hâc Sede Communionem teneatur; deindeque ad singulos Diœcesis Ordines sermonem, convertens, hortatur, monetque omnes, ut se tanquam legitimum Pastorem excipiant, & Constitutionem ultro amplectantur.

Væ misero! Missis per Nos consulto iis, quæ ad Civile Regimen pertinent, quâ ille temeritate defendendam suscipit Constitutionem, super Ecclesiasticis rebus versantem, quam omnes ferè Gallicanæ Ecclesiæ Episcopi, aliique plures Ecclesiastici Viri improbarunt, ac refutarunt, uti Dogmati adversantem, & à communi Disciplinâ abhorrentem præsertim in Electionibus, & Consecrationibus Episcoporum? Hanc sane veritatem, quæ incurrit in oculos, ne ipse quidem dissimulare potuisset, aut obtegere, nisi datâ operâ præteriiisset silentio, quæ *postremo* in Conventu Gallicano absurdiora decreta prodierunt: ista enim præter alias improbitates eò progressa etiam sunt, ut jus instituendi confirmandique tribuerent cuicumque Episcopo pro directorii arbitrio, ac voluntate.

Perlegat infelix iste, qui adeò longe in viâ perditionis processit, Nostram ad Episcopos Galliarum Responzionem, quâ omnium suæ Epistolæ errorum monstra præviâ confutatione prostravimus, & quam odit veritatem, in singulis Articulis manifeste elucentem deprehendet. Sciât interea, se sibi ipsi sententiam dixisse. Si enim verum est, justa veterem Disciplinam, *ex Canone nicæno* quem is in medium adducit, profluentem, opus omninò esse, ut electus ad legitimum titulum nanciscendum per Metropolitanum suum confirmaretur; quod quidem Metropolitanarum jus à Sedis Apostolicæ jure manabat; qui fieri poterit, ut canonicè, & legitimè immissum se putet *Expilly*, dum Consecrationem suam non Archiepiscopo Turonensi, cujus suffraganea est Corisopitensis Ecclesia, sed aliis Episcopis referre debet acceptam? Hi enim cum ad alienas provincias pertineant, si sacrilego ausu Ordinem potuerunt eidem conferre, nequiverunt profecto Jurisdictionem tribuere, quâ ipsi quoque juxta omnium ætatum Disciplinam destituuntur omninò. Hæc porrò Jurisdictionis conferendæ potestas ex novâ Disciplinâ à pluribus sæculis jam receptâ à conciliis Generalibus, & ab ipsis Concordatis confirmata, ne ad Metropolitanos quidem potest ullo modo attinere, utpote quæ illuc reversa, unde discesserat, unice residet penes Apostolicam Sedem; ita ut hodie *Romanus Pontifex ex numeris sui officio Pastores singulis ecclesiis præficiat* =, ut verbis utamur Concilii Tridentini *Sess. 24, Cap. 1, de reform.*, adeoque legitima Consecratio nulla fiat

in Ecclesiâ Catholicâ universâ , nisi ex Apostolicæ Sedis mandato.

Tantum verò abest , ut litteræ ad Nos datæ adjuvent , ut magis reum efficiant , & nequeant Schismaticam notam effugere. Illæ enim nonnisi simulatam quamdam imaginem præferentes Communionis nobiscum ineundæ , ne verbum quidem faciunt de Confirmatione per Nos obri-
nenda , & illegitimam tantum Nobis electionem significant , ut gallicanorum Decretorum verba jubebant. Hinc Nos Decessorum Nostrorum exempla secuti minimè illis duximus rescribendum , sed seriò illum commonesieri mandavimus , ne ulterius progredi niteretur , quemadmodum sperabamus futurum. Etenim fuit etiam hâc de re ab Rhedonensi Episcopo sponte monitus , dum is , quam sibi enixè flagitabat , institutionem , confirmationemque negavit. Quapropter loco illum suscipiendi tanquam pastorem , debet populus cum horrore tanquam invasorem rejicere : invasorem inquit , qui quam veritatem agnoscere debebat , profiteri neglexit , qui mentito abuti cœpit Pastoris officio , qui deniquè eò arrogantia devenit , ut in fine pastoralis Epistolæ quadragesimale Ecclesiastici præcepti vinculum laxare non dubitaverit , ita ut = *Imitator Diaboli fuerit , & in veritate non steterit , malè utens specie pervasi honoris , & nominis* = ; quemadmodum de simili invasore à S. Leone Magno dictum est scribente *ad quosdam Ægypti Episcopos*.

Videntes itaque Nos ex multiplici tot criminum ferie , per Galliarum Regnum tam benè de Religione meritum , & adeò Nobis carum , magis
magisque

magisque Schisma invehî , atque amplificari , videntesque hanc ipsam ob causam novos in dies tam primi , quàm secundi ordinis Pastores undiquè eligi , & Ministros legitimos de suo loco dejici atque exturbari , eorumque vice rapaces lupos subrogari , non possumus equidem tam lacrimabili rerum aspectu non commoveri. Ut igitur gliscenti Schismati primo quoque tempore obicem opponamus , ut ad officia revocentur errantes , ut boni persistent in proposito , utque Religio in florentissimo isto Regno servetur , Nos consiliis inhærentes Venerabilium Fratrum Nostorum S. R. E. Cardinalium , & votis obsecundantes totius Episcopalis cœtus Ecclesiæ Gallicanæ , Nostrorumque Prædecessorum exempla imitantes , Apostolica , qua utimur , potestate tenore præsentium in primis edicimus , ut quotquot sunt S. R. E. Cardinales , Archiepiscopi , Episcopi , Abbates , Vicarii , Canonici , Parochi , Presbyteri , cunctique Ecclesiasticæ militiæ adscripti , sive Sæculares , sive Regulares , qui *Civicum juramentum* purè , & simpliciter , prout à Conventu Nationali præscriptum fuit , emisérunt , errorum omnium venenatum fontem , & originem , Catholicæque Gallicanæ ecclesiæ mœoris præcipuam causam , nisi intra quadraginta dies , ab hac die numerandos ; hujusmodi juramentum retractaverint , à cujuscumque Ordinis exercitio *sint suspensi* , & irregularitati obnoxii , si ordines exercuerint.

Insuper peculiariter declaramus , *Electiões* prædictorum *Expilly* , *Marolles* , *Saurine* , *Massieu* , *Lindet* , *Laurent* , *Heraudin* & *Gobel*

in Episcopos *Corisopitensem*, *Suessionensem*, *Aquensem*, *Bellovacensem*, *Ebroicensem*, *Molinsensem*, *Castri Rufi* & *Parisiensem* illegitimas, sacrilegas & prorsus nullas fuisse, & esse, prout eas rescendimus, delemus, abrogamus una cum assertorum Episcopatum *Molinsis*, *Castri Rufi*, & aliorum nova erectione.

Declaramus item ac decernimus, nefarias eorundem *Consecrationes* fuisse, & esse omnino illicitas, illegitimas, sacrilegas, & factas contra Sanctorum Canonum Sanctiones; ac proinde eosdem temerè, nulloque jure electos omni Ecclesiastica, & spiritali jurisdictione pro animarum regimine carere, atque illicitè consecratos ab omni exercitio Episcopalis Ordinis esse *suspensos*.

Pariter declaramus *suspensos esse* ab omni exercitio Episcopalis Ordinis *Carolum Episcopum Augustodunensem*, *Joannem-Baptistam Episcopum Babylonis* & *Joannem-Josephum Episcopum Liddæ* sacrilegos Consecratores, seu Adfistentes, & *suspensos* pariter esse ab exercitio sacerdotalis, seu cujuscumque alterius Ordinis eos omnes, qui in execrandi hujusmodi Consecrationibus *opem, operam, consensum & consilium* præstiterunt.

Mandamus propterea, districtèque interdici-
mus memorato *Expilly*, aliisque perperam electis, & illicitè consecratis sub eadem *suspensionis poena*, ne audeant Episcopalem Jurisdictionem, aliamve ullam pro Animarum regimine auctoritatem, quam numquam sunt consecuti, sibi arrogare, vel pro suscipiendis Ordinibus dimissorias litteras dare, Pastores, Vicarios, Missionarios

Deservitores , Functionarios , Ministros , aut alios , quocumque nomine nuncupentur , ad animarum curam , & Sacramentorum administrationem , quovis etiam necessitatis prætectu , constituere , deputare , ac confirmare , nec non alia agere , decernere , & constituere , sive *seorsim* , sive conjunctim in modum *Conciliabuli* in rebus ad Ecclesiasticam Jurisdictionem pertinentibus ; declarantes , ac palàm edicentes , tam litteras dimissoriales , & deputationes , seu confirmationes , si quæ datæ ; factæque sint , aut in posterum dari , fierique contingat , quàm alia acta omnia , quæ temerario ausu fierent cum omnibus inde secutis irrita prorsus esse , ac nullius roboris , & momenti.

Æquè mandamus , & sub simili *suspensionis poenâ* inhibemus tam consecratis quàm Consecratoribus prædictis , ne audeant illicitè Sacramentum Confirmationis , aut ordines conferre , vel quocumque modo Ordinem Episcopalem , à quo suspensi sunt , exercere ; ac proinde qui ab ipsis fuerint Ecclesiasticis Ordinibus initiati , noverint suspensionis vinculo se obstrictos , & si susceptos Ordines exercuerint , irregularitati etiam fore obnoxios.

Ad præcavenda autem majora mala , tenore & auctoritate paribus decernimus , & declaramus , *alias omnes Electiones* , ad Galliarum Ecclesias Cathedrales , & Parochiales , cum vacuas , tum multò magis plenas , cum veteris , tum fortius novæ & illegitimæ erectionis ; ad formam memoratæ Constitutionis Cleri à Municipalium , Districtuum Electoribus usquemodo peractas , quas volumus pro expressis haberi , & quotquot

peragentur, irritas, illegitimas; sacrilegas, & prorsus nullas fuisse; esse, & fore, easque per præsentes, & nunc pro tunc rescindimus, delemus, abrogamus; Declarantes idcirco, eosdem perperam nulloque jure electos, aliosque simili modo eligendos ad Ecclesias tam Cathedrales, quàm Parochiales omni Ecclesiastica, & spiritali Jurisdictione pro animarum regimine carere, atque Episcopos illicitè hætenus consecratos, quos pariter pro nominatis haberi volumus, & in posterum consecrandos ab omni exercitio Episcopalis Ordinis, & Parochos nulliter institutos, & instituendos à Sacerdotali ministerio esse, & fore suspensos; adeoque districte interdicimus tam electis, & forsan eligendis in Episcopos, ne à quocumque sive Metropolitano, sive Episcopo Ordinem, seu consecrationem Episcopalem suscipere audeant, quam ipsis pseudo-Episcopis, eorumque sacrilegis Consecratoribus, & aliis omnibus Archiepiscopis, & Episcopis, ne eosdem frustra electos & eligendos, consecrare quovis sub prætextu, & colore præsumant; præcipientes insuper dictis electis, & eligendis sive in Episcopos, sive in Parochos, ne ullo modo se pro Archiepiscopis, sive Episcopis, sive Parochis, seu Vicariis gerant, aut cujusvis Cathedralis, sive Parochialis Ecclesiæ titulo se nomenent, & ne jurisdictionem ullam, proque animarum regimine auctoritatem, facultatemque sibi arrogant *sub pœna suspensionis, & nullitatis*, à qua quidem suspensionis pœna nemo ex hætenus nominatis poterit unquam liberari, nisi per Nos ipsos, aut per eos, quos Apostolica Sedes delegarit.

Qua majori uti Nobis licuit benignitate , declaravimus huc usque Canonicas pœnas inflictas , ut mala hætenus perpetrata emendentur , utque in posterum , ne latius dimanent , impediatur. Nos enim in Domino confidimus futurum , ut Consecrantes , ut iam Cathedralium , quam Parochialium Ecclesiarum invasores , ut Auctores , fautoresque omnes prædictæ , Constitutionis suam agnoscant errorem , ac pœnitentia ducti ad Ovile regrediantur , unde non sine machinatione , & insidiis avulsi sunt. Eos itaque nos paternis verbis compellantes hortamur etiam atque etiam , obsecramus in Domino , ut à ministerio se abdicent , ut à perditionis viâ , in quam se dederunt præcipites , pedem referant , ut nunquam committant , per homines philosophia sæculi hujus imbutos ea in vulgus diffundi doctrinarum monstra , quæ Christi institutioni , traditionique Patrum , & Ecclesiæ regulis adversantur. Quandoquidem si fiet unquam , ut Noster hic mitis agendi modus , & nostræ paternæ monitiones , quod Deus avertat , in irritum sint recasuræ ; sciant Nostræ mentis non esse , illos à gravioribus iis pœnis liberare , quibus per Canones subjiciuntur ; sibi que certò persuadeant , se per Nos anathemati subiectum iri , Nosque illos anathemate percussos Ecclesiæ universæ denunciaturus , tanquam Schismaticos ; à Communione Ecclesiæ , Nostræque segregatos , Maxime enim conveniens est. = *Ut quisquis in insipientiæ suæ luto jacere delegerit , Statuta permanent , & cum eis habeat sortem , quorum est secutus errorem* = ; ita nos edocente M. Leone Prædecessore nostro in epistola ad Julianum Episcopum Coensem.

Vos nunc alloquimur , ven. Fratres , qui , paucis exceptis , vestrorum erga gregem officiorum munera probè agnovistis , eaque , humanis rationibus sepositis , palam professi estis , ibique curas , ac labores majores impendi oportere existimastis , ubi majora pericula ingruerant ; Vobisque aptamus elogium , quo laudatus Leo magnus cumulavit *Episcopos ex Ægypto Catholicos apud Constantinopolim constitutos = Licet laboribus dilectionis vestræ , quos pro observantia Catholicæ Fidei suscepistis toto corde compatiar , & ea , quæ vobis ab hæreticis illata sunt , non aliter accipiam , quam si ipse pertulerim , intelligo tamen magis esse gaudii , quam mœroris , quod confortante Vos Domino Jesu Christo , in Evangelicâ Apostolicâque doctrinâ insuperabiles perstistis . Et cum vos inimici Fidei Christianæ ab Ecclesiarum Sede divellerent , maluistis peregrinationis injuriam pati , quam ulla impietatis ipsorum contagione violari . =* Equidem Vos intuentes non possumus consolatione non affici , Vosque , ut in proposito perstetis , non vehementer hortari . Ad memoriam itaque vestram revocamus spiritualis illius conjugii nexum , quo Ecclesiis vestris adstricti estis , quodque nonnisi morte , aut Apostolicâ nostrâ potest auctoritate juxta Canonicam formam dissolvi ; iis ergo adhaerescite , neque illas unquam derelinquite luporum rapacium arbitrio , adversus quorum insidias vos jam sancto ardore æstuantes & vocem extulistis , & legitimæ autoritatis munia obire non dubitastis .

Ad vos deinde sermonem convertimus , Dilecti Filii , spectabilium Capitulorum Canonici , qui

vestris Archiepiscopis , & Episcopis ita ut decet ,
 subjecti , quique tanquam plura membra cum ca-
 pite colligata unum Ecclesiasticum Corpus efficitis ,
 quod à Civili nequit potestate solvi , aut everti.
 Vos itidem , qui tantâ cum laude , estis egregia
 vestrorum Præfulum exempla secuti , à rectâ , in
 quâ inceditis , viâ nunquam deflectite , nec unquam
 item committite , ut quisquam mentiis exuviis
 Episcoporum , aut Vicariorum indutus , Regimen
 vestrarum Ecclesiarum arripiat. Illæ enim , si suo
 Pastore viduatæ remaneant , ad Vos unice perti-
 nebunt , quidquid contra Vos frustra novæ quæ-
 dam molitiones effecerint. Una ergo animotum ,
 & consiliorum conjunctione omnem à vobis in-
 vasionem & Schisma , quàm longissime potestis ,
 arcete.

Vos etiam affamur , Dilecti filii , Parochi &
 Pastores secundi ordinis , qui & plurimi numero ,
 & virtute constantes vestro munere estis perfundti ,
 illorum ex vestris Collegis omninò dissimiles , qui
 aut infirmitate devicti , aut ambitionis æstu cor-
 reпти manciparunt errori , quique per Nos moniti ,
 mature , ut speramus , ad officia convolabunt.
 Fortes incæpto operi insistire , ac mementote quam
 à vestris legitimis Episcopis institutionem accepis-
 tis , nonnisi ab iisdem adimi vobis posse ; ita ut
 licet per Civilem potestatem è gradu vestro dejeçti ,
 & expulsi , semper futuri sitis Pastores legitimi ,
 vestro munere adstricti , quantum in Vobis erit ,
 ad fures arcendos , qui in vestrum locum subin-
 gredi enituntur non alio consilio , nisi ut animas
 perdant vestræ curæ concreditas , & de quarum
 salute eritis rationem reddituri.

Vos item alloquimur, Dilecti Filii, Sacerdotes aliique Gallicani Cleri ministri, qui in fortem Domini vocari debetis vestris legitimis Pastoribus adhærere, & esse in Fide, ac Doctrina constantes; quibus nihil esse debet antiquius, quàm ut sacrilegos invasores vitetis, ac reprobetis.

Vos tandem in Domino obtestamur, Dilecti Filii, Catholici qui in regno Galliarum estis universi, vobisque religionem, ac fidem Patrum vestrorum commemorantes intimo cordis affectu suademus, ne ab illa secedatis, quippe quæ una est ac vera Religio, quæ & vitam æternam largitur, & civiles etiam societates sospitat, atque fortunat. Cavete diligenter, ne aures præbeatis insidiosis vocibus philosophiæ sæculi hujus, quæ mortem parant; & invasores omnes, sive Archiepiscopi, sive Parochi appellentur, ita devitate, ut nihil cum illis sit vobis commune, præsertim in Divinis, auscultantes assiduè legitimorum voces Pastorum, qui vivunt adhuc, quique vobis canonicè præficientur in posterum; uno denique verbo Nobis adhærete; nemo enim in Ecclesia Christi potest esse, nisi Capiti ipsius visibili uniatur, & in Cathedra Petri solidetur. Utque omnes vehementius ad sua munera obeunda excitentur; Nos à Patre cœlesti spiritum consilii, veritatis, & constantiæ in vos implorantes, in paternæ dilectionis pignus; vobis, Dilecti Filii Nostri, venerabiles Fratres, ac Dilecti Filii, Apostolicam Benedictionem peramanter impertimur. Datum Romæ apud S. Petrum, die decimâ tertiâ Aprilis MDCCXCI. Pontificatus Nostri Anno Decimo Septimo.

PIUS QUI SUPRA.